

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

后妃

明太祖鑒前代女禍立綱陳紀首嚴內教洪武元年命儒臣修女誡諭翰林學士朱升曰治天下者正家爲先正家之道始於謹夫婦后妃雖母儀天下然不可俾預政事至於嬪嬙之屬不過備職事侍巾櫛恩寵或過則驕恣犯分上下失序歷代宮闈政由內出鮮不爲禍惟明主能察於未然下此多爲所惑卿等其察女誡及古賢妃事可爲法者使後世子孫知所持守升等乃編錄上之五年六月命禮臣議宮官女職之制禮臣上言周制後宮設內官以贊內治漢設內官一十四等凡數百人唐設六局二十四司官凡一百九十人女史五十餘人皆選良家女充之帝以所說過多命重加裁定於是折衷曩制立六局一司局曰尚宮尚儀尚服尚食尚寢尚功司曰宮正秩皆正六品每局領四司其屬二十有四而尚宮總行六局之事戒令責罰則宮正掌之官七十五人女史十八人視唐減百四十餘人凡以服勞宮寢祇勤典守而已諸妃位號亦惟取賢淑莊敬惠順康寧爲稱閨房雍肅旨寓深遠又命工部制紅牌鐫戒諭后妃之詞懸於宮中牌用鐵字飾以金復著令典自后妃以下至嬪御女史巨細衣食之費金銀幣帛器用百物之供皆自尚宮取旨牒內使監覆奏移部臣取給焉若尚宮不及奏內使監不覆奏而輒領於部者論死或以私書出外罪亦如之宮嬪以下有疾醫者不得入宮以證取藥何其慎也是以終明之代宮壺肅清論者謂其家法之善超軼漢唐爰自孝慈以迄愍后考厥族里次其世代雖所遇不齊顯晦異致而凡居正號者並列於篇其妃嬪有事實者亦附見焉

后妃一

太祖孝慈高皇后

孫貴妃

李淑妃

郭寧妃

惠帝馬皇后

成祖仁孝徐皇后

王貴妃

權賢妃

仁宗誠孝張皇后

宣宗恭讓胡皇后

孝恭孫皇后

吳賢妃

郭嬪

英宗孝莊錢皇后

孝肅周太后

景帝汪廢后

肅孝杭皇后

憲宗吳廢后

孝貞王皇后

孝穆紀太后

孝惠邵太后

萬貴妃

太祖孝慈高皇后馬氏宿州人父馬公母鄭媼早卒馬公素善郭子興遂以后託子興馬公卒子興育之如己女子興奇太祖以后歸焉后仁慈有智鑒好書史太祖有劄記輒命后掌之倉卒未嘗忘子興嘗信讒疑太祖后善事其妻嫌隙得釋太祖既克太平后率將士妻妾渡江及居江寧吳漢接境戰無虛日親緝甲士衣鞋佐軍陳友諒寇龍灣太祖率師禦之后盡發宮中金帛犒士嘗語太祖定天下以不殺人爲本太祖善之洪武元年正月太祖卽帝位冊爲皇后果后從帝軍中值歲大歉帝又爲郭氏所疑嘗乏食后竊炊餅懷以進肉爲焦居常貯糗脯脯修供帝無所乏絕而已不宿飽及貴帝比之蕪荑豆粥滲沱麥飯每對羣臣述后賢同於唐長孫皇后退以語后后曰妾聞夫婦相保易君臣相保難陛下不忘妾同貧賤願無忘羣臣同艱難且妾何敢比長孫皇后也后勤於內治暇則講求古訓告六宮以宋多賢后命女史錄其家法朝夕省覽或言宋過仁厚后曰過仁厚不愈於刻薄乎一日問女史黃老何教也而竇太后好之女史曰清淨無爲爲本若絕仁棄義民復孝慈是其教矣后曰孝慈卽仁義也詎有絕仁義而爲孝慈者哉后嘗誦小學求帝表章焉帝前殿決事或震怒后伺帝還宮輒隨事微諫雖帝性嚴然爲緩刑戮者數矣叅軍郭景祥守和州人言其子持稍欲殺父帝將誅之后曰景祥止一子人言或不實殺之恐絕其後帝廉之果枉李文忠守嚴州楊憲誣其不法帝欲召還后曰嚴敵境也輕易將不宜且文忠素賢憲言詎可信帝遂已文忠後卒有功學士宋濂坐孫慎罪逮至論死后

諫曰民家爲子弟延師尚以禮全終始况天子乎且濂家居必不知情帝不聽會后侍帝食不御酒肉帝問故對曰妾爲宋先生作福事也帝惻然投箸起明日赦濂安置茂州吳興富民沈秀者助築都城三之一又請蠲軍帝怒曰匹夫犒天子軍亂民也宜誅后諫曰妾聞法者誅不法也非以誅不祥民富敵國民自不祥不祥之民天將災之陛下何誅焉乃釋秀戍雲南帝嘗令重囚築城后曰贖罪罰役國家至恩但疲囚加役恐仍不免死亡帝乃悉赦之帝嘗怒責宮人后亦伴怒令執付宮正司議罪帝曰何爲后后曰帝王不以喜怒加刑賞當陛下怒時恐有畸重付宮正則酌其平矣卽陛下論人罪亦詔有司耳一日問帝今天下民安乎帝曰此非爾所宜問也后曰陛下天下父妾辱天下母子之安否何可不問遇歲旱輒率宮人蔬食助祈禱歲凶則設麥飯野羹帝或告以振卹后曰振卹不如蓄積之先備也奏事官朝散會食廷中后命中官取飲食親嘗之味弗甘遂啓帝曰人主自奉欲薄養賢宜厚帝爲飭光祿官帝幸太學還后問生徒幾何帝曰數千后曰人才衆矣諸生有廩食妻子將何所仰給於是立紅板倉積糧賜其家太學生家糧自后始諸將克元都俘寶玉至后曰元有是而不能守意者帝王自有寶歟帝曰朕知后謂得賢爲寶耳后拜謝曰誠如陛下言妾與陛下起貧賤至今日恒恐驕縱生於奢侈危亡起於細微故願得賢人共理天下又曰法屢更必弊法弊則奸生民數擾必困民困則亂生帝嘆曰至言也命女史書之冊其規正類如此帝每御膳后皆躬自省視平居服大練浣濯之衣雖敝不忍易聞元世祖后煮故弓弦事亦命取練織爲衾褥以賜高年笑獨餘帛類絲緝成衣裳賜諸王妃公主便知蠶桑艱難妃嬪宮人被寵有子者厚待之命婦入朝待之如家人禮帝欲訪后族人官之后謝曰爵祿私外家非法力辭而止然言及父母早卒輒悲哀流涕帝封馬公徐王鄭媼爲王夫人修墓置廟焉洪武十五年八月寢疾羣臣請禱祀求良醫后謂帝曰死生命也禱祀何益且醫何能活人使服藥不效得毋以妾故而罪諸醫乎疾亟帝問所欲言曰願陛下求賢納諫慎終如始子孫皆賢臣民得所而已是月丙戌崩年五十一帝慟哭遂不復立后是年九月庚午葬孝陵諡曰孝慈皇后宮人思之作歌曰我后聖慈化行家邦撫我育我懷德難忘懷德難忘於萬斯年茲彼下泉悠悠蒼天永樂元年上半年上尊諡曰孝慈昭憲至仁文德承天順聖高皇后

嘉靖十七年加上尊諡曰孝慈貞化哲順仁徽成天育聖至德高皇后

成穆貴妃孫氏陳州人元末兵亂妃父母俱亡從仲兄蕃避兵揚州青軍陷城元帥馬世熊得之育爲義女年十八太祖納焉及卽位冊封貴妃位衆妃上洪武七年九月薨年三十有二帝以妃無子命周王橐行慈母服三年東宮諸王皆期敕儒臣作孝慈錄庶子爲生母服三年衆子爲庶母期自妃始葬褚岡賜兄瑛田租三百石歲供祀後附葬孝陵

淑妃李氏壽州人父傑洪武初以廣武衛指揮北征卒於陣十七年九月孝慈皇后服除冊封淑妃攝六宮事未幾薨

寧妃郭氏淳人郭山甫女山甫善相人太祖微時過其家山甫相之大驚曰公相貴不可言因謂諸子興英曰吾相汝曹皆可封侯者以此亟遣從渡江並遣妃侍太祖後封寧妃李淑妃薨妃攝六宮事山甫累贈營國公興英皆以功封侯自有傳

惠帝皇后馬氏光祿少卿全女也洪武二十八年冊爲皇太孫妃建文元年二月冊爲皇后四年六月城陷崩於火

成祖仁孝皇后徐氏中山王達長女也幼貞靜好讀書稱女諸生太祖聞后賢淑召達謂曰朕與卿布衣交也古君臣相契者率爲婚姻卿有令女其以朕子楝配焉達頓首謝洪武九年冊爲燕王妃高皇后深愛之從王之藩居孝慈高皇后喪三年蔬食如禮高皇后遺言可誦者后一一舉之不遺靖難兵起王襲大寧李景隆乘閒進圖北平時仁宗以世子居守凡部分備禦多稟命於后景隆攻城急城中兵少后激勸將校士民妻皆授甲登陴拒守城卒以全王卽帝位冊爲皇后言南北每年戰鬪兵民疲敝宜與休息又言當世賢才皆高皇帝所遺陛下不宜以新舊間又言帝堯施仁自親始帝輒嘉納焉初后弟增壽常以國情輸之燕爲惠帝所誅至是欲贈爵后力言不可帝不聽竟封定國公命其子景昌襲乃以告后后曰非妾志也終弗謝嘗言漢趙二王性不順官僚宜擇廷臣兼署之一日問陛下誰與圖治者帝曰六卿理政務翰林職論思后因請悉召見其命

婦賜冠服鈔幣諭曰婦之事夫奚止饋食衣服而已必有助焉朋友之言有從有違夫婦之言婉順易入吾旦夕侍上惟以生民爲念汝曹勉之嘗採女憲女誠作內訓二十篇又類編古人嘉言善行作勸善書頒行天下永樂五年七月疾革惟勸帝愛惜百姓廣求賢才恩禮宗室母驕畜外家又告皇太子曩者北平將校妻爲我荷戈城守恨未獲隨皇帝北巡一資卹之也是月乙卯崩年四十有六帝悲慟爲薦大齋於靈谷天禧二寺聽羣臣致祭光祿爲具物甲午諡曰仁孝皇后七年營壽陵於昌平之天壽山又四年而陵成以后葬焉卽長陵也帝亦不復立后仁宗卽位上尊諡曰仁孝慈懿誠明莊獻配天齊聖文皇后祔太廟

昭獻貴妃王氏蘇州人永樂七年封貴妃妃有賢德事仁孝皇后恭謹爲帝所重帝晚年多急怒妃曲爲調護自太子諸王公主以下皆倚賴焉十八年七月薨禮視太祖成穆孫貴妃

恭獻賢妃權氏朝鮮人永樂時朝鮮貢女充掖庭妃與焉姿質穠粹善吹玉簫帝愛憐之七年封賢妃命其父永均爲光祿卿明年十月侍帝北征凱還薨於臨城葬驛縣

仁宗誠孝皇后張氏永城人父麒以女貴追封彭城伯具外戚傳洪武十六年封燕世子妃永樂二年封皇太子妃仁宗立冊爲皇后宣宗卽位尊爲皇太后英宗卽位尊爲太皇太后后始爲太子妃操婦道至謹雅得成祖及仁孝皇后懽太子數爲漢趙二王所問體肥碩不能騎射成祖志至減太子宮膳瀕易者屢矣卒以后故得不廢及立爲后中外政事莫不周知宣德初軍國大議多稟聽裁決是時海內寧泰帝入奉起居出奉遊宴四方貢獻雖微物必先上皇太后兩宮慈孝聞天下三年太后遊西苑皇后妃侍帝親掖輿登萬歲山奉觴上壽獻詩頌德又明年謁長獻二陵帝親轡騎導至河橋下馬扶輦畿民夾道拜觀陵旁老嫗皆山呼拜迎太后顧曰百姓戴君以能安之耳皇帝宜重念及還過農家召老婦問生業賜鈔幣有獻蔬食酒漿者取以賜帝曰此田家味也從臣英國公張輔尚書蹇義大學士楊士奇楊榮金幼孜楊溥請見行殿太后慰勞之且曰爾等先朝舊人勉輔嗣君他日帝謂士奇曰皇太后謁陵還道汝輩行事甚習言輔武臣也達大義義重厚小心第寡斷汝克正言無避忤先帝或數不樂然終從汝以不敗事又有三事時悔不從也太后遇外家嚴弟昇

至淳謹然不許預議國事宣宗崩英宗方九歲宮中訛言將召立襄王矣太后趣召諸大臣至乾清宮指太子泣曰此新天子也羣臣呼萬歲浮言乃息大臣請太后垂簾聽政太后曰毋壞祖宗法第悉罷一切不急務時最帝向學委任股肱以故王振雖寵於帝終太后世不敢專大政正統七年十月崩當大漸召士奇溥入命中官問國家尚有何大事未辦者士奇舉三事一謂建庶人雖亡當修實錄一謂太宗詔有收方孝孺諸臣遺書者死宜弛其禁其三未及奏上而太后已崩遺詔勉大臣佐帝惇行仁政語甚諄篤上尊諡曰誠孝恭肅明德弘仁順天啓聖昭皇后合葬獻陵附太廟

宣宗恭讓皇后胡氏名善祥濟寧人永樂十五年選爲皇太孫妃已爲皇太子妃宣宗卽位立爲皇后時孫貴妃有寵后未有子又善病三年春帝令后上表辭位乃退居長安宮賜號靜慈仙師而冊貴妃爲后諸大臣張輔蹇義夏原吉楊士奇楊榮等不能爭張太后憫后賢常召居清寧宮內廷朝宴命居孫后上孫后常怏怏正統七年十月太皇太后崩后痛哭不已踰年亦崩用嬪御禮葬金山后無過被廢天下聞而憐之宣宗後亦悔嘗自解曰此朕少年事天順六年孫太后崩錢皇后爲英宗言后賢而無罪廢爲仙師其沒也人畏太后殮葬皆不如禮因勸復其位號英宗問大學士李賢賢對曰陛下此心地鬼神實臨之然臣以陵寢享殿神主俱宜如奉先殿式庶稱陛下明孝七年七月上尊諡曰恭讓誠順康穆靜慈章皇后修陵寢不附廟

宣宗孝恭皇后孫氏鄉平人幼有美色父忠永城縣主簿也誠孝皇后母彭城伯夫人故永城人時時入禁中言忠有賢女遂得入宮方十餘歲成祖命誠孝后育之已而宣宗婚詔選濟寧胡氏爲妃而以孫氏爲嬪宣宗卽位封貴妃故事皇后金寶金冊貴妃以下有冊無寶妃有寵宣德元年五月帝請於太后製金寶賜焉貴妃有寶自此始妃亦無子陰取宮人子爲己子卽英宗也由是眷寵益重胡后上表遜位請早定國本妃僞辭曰后病痊自有子吾子敢先后子耶三年三月胡后廢遂冊爲皇后英宗立尊爲皇太后英宗北狩太后命郕王監國景帝卽位尊爲上聖皇太后時英宗在迤北數寄禦寒衣裘及還幽南宮太后數入省視石亨等謀奪門先密白太后許之英宗復辟上徽號曰聖烈慈壽皇太后明興宮闈徽號亦自此始天順六年九月崩上尊諡

曰孝恭懿憲慈仁莊烈睿天觀聖章皇后合葬景陵祔太廟而英宗生母人卒無知之者

吳太后景帝母也丹徒人宣宗爲太子時選入宮宣德三年封賢妃景帝卽位尊爲皇太后英宗復辟復稱宣廟賢妃成化中薨

郭嬪名愛字善理鳳陽人賢而有文入宮二旬而卒自知死期書楚聲以自哀詞曰修短有數分不足較也生而如夢兮死則覺也先吾親而歸兮慚予之失孝也心懷悽而不能已兮是則可悼也正統元年八月追贈皇庶母惠妃何氏爲貴妃諡端靜趙氏爲賢妃諡純靜吳氏爲惠妃諡貞順焦氏爲淑妃諡莊靜曹氏爲敬妃諡莊順徐氏爲順妃諡貞惠袁氏爲麗妃諡恭定諸氏爲淑妃諡貞靜李氏爲充妃諡恭順何氏爲成妃諡肅僖冊文曰茲委身而蹈義隨龍馭以上賓宜薦徽稱用彰節行蓋宣宗殉葬宮妃也初太祖崩宮人多從死者建文永樂時相繼優恤若張鳳李衡趙福張壁汪賓諸家皆自錦衣衛所試百戶散騎帶刀舍人進千百戶帶俸世襲人謂之太祖朝天女戶歷成祖仁宣二宗亦皆用殉景帝以郕王薨猶用其制蓋當時王府皆然至英宗遺詔始罷之

英宗孝莊皇后錢氏海州人正統七年立爲后帝憫后族單微欲侯之后輒遜謝故后家獨無封英宗北狩傾中宮貴佐迎駕夜哀泣籲天倦卽臥地損一股以哭泣復損一目英宗在南宮不自得后曲爲慰解后無子周貴妃有子立爲皇太子英宗大漸遺命曰錢皇后千秋萬歲後與朕同葬大學士李賢退而書之冊憲宗立上兩宮徽號下廷臣議太監夏時希貴妃意傳諭獨尊貴妃爲皇太后大學士李賢彭時力爭乃兩宮並尊而稱后爲慈懿皇太后及營裕陵賢時請營三壙下廷議夏時復言不可事竟寢成化四年六月太后崩周太后不欲后合葬帝使夏時懷恩召大臣議彭時首對曰合葬裕陵主祔廟定禮也翼日帝召問時對如前帝曰朕豈不知慮他日妨母后耳時曰皇上孝事兩宮聖德彰聞禮之所合孝之所歸也商輅亦言不祔葬損聖德劉定之曰孝從義不從命帝默然久之曰不從命尚得爲孝耶時力請合葬裕陵左而虛右以待周太后已復與大臣疏爭帝再下廷議吏部尚書李秉禮部尚書姚夔集廷臣九十九人議皆請如時言帝曰卿等言是顧朕屢

請太后未得命乖禮非孝違親亦非孝明日詹事柯潛給事中魏元等上疏又明日夔等合疏上皆執議如初中旨猶諭別擇葬地於是百官伏哭文華門外帝命羣臣退衆叩頭不得旨不敢退自己至申乃得允衆呼萬歲出事詳時夔傳中是年七月上尊諡曰孝莊獻穆弘惠顯仁恭天欽聖睿皇后附太廟九月合葬裕陵異隧距英宗元堂數丈許中室之虛右曠以待周太后其隧獨通而奉先殿祭亦不設后主弘治十七年周太后崩孝宗御便殿出裕陵圖示大學士劉健謝遷李東陽曰陵有二隧若者窒若者可通往來皆先朝內臣所爲此未合禮昨見成化間彭時姚夔等章奏先朝大臣爲國如此先帝亦不得已耳欽天監言通隧上千先帝陵堂恐動地脉朕已面折之窒則天地閉塞通則風氣流行健等因力贊帝復問附廟禮健等言附二后自唐始也肅三后自宋始也漢以前一帝一后曩者定議合附孝莊太后居左今大行太皇太后居右且引唐宋故事爲証臣等以此不敢復論帝曰二后已非况復三后遷曰宋附三后一繼立一生母也帝曰事須師古太皇太后鞠育朕躬朕豈敢忘顧私情耳祖宗來一帝一后今並附壞禮自朕始且奉先殿祭皇祖特座一飯一匙而已夫孝穆皇太后朕生母也別祀之奉慈殿今仁壽宮前殿稍寬朕欲奉太皇太后於此他日奉孝穆皇太后於後歲時祭享如太廟於是命羣臣詳議議上將建新廟欽天監奏年方有礙廷議請暫祀周太后於奉慈殿稱孝肅太皇太后殿在奉先殿西帝以祀孝穆至是中奉孝肅而徙孝穆居左焉帝始欲通隧亦以陰陽家言不果行

孝肅周太后英宗妃憲宗生母也昌平人天順元年封貴妃憲宗卽位尊爲皇太后其年十月太后誕日帝令僧道建齋祭禮部尚書姚夔帥羣臣詣齋所爲太后祈福給事中張寧等劾之帝是其言令自後僧道齋醮百官不得行香二十三年四月上徽號曰聖慈仁壽皇太后孝宗立尊爲太皇太后先是憲宗在位事太后至孝五日一朝燕享必親太后意所欲惟恐不懼至錢太后合葬裕陵太后殊難之憲宗委曲寬譬乃得請孝宗生西宮母妃紀氏薨太后育之宮中省視萬方及孝宗卽位事太后亦至孝太后病瘍久之愈諸諭羣臣曰自英皇厭代予正位長樂憲宗皇帝以天下養二十四年猶一日茲予偶患瘍皇帝夜籲天爲予請命春郊罷宴問

視惟勤俾老年疾體獲底康寧以昔視今父子兩世孝同一揆予甚嘉焉弘治十一年冬清寧宮災太后移居仁壽宮明年清寧宮成廼還居焉太后弟長寧伯或家有賜田有司請釐正之帝未許也太后曰柰何以我故飢皇帝法使歸地於官弘治十七年三月崩諡孝肅貞順康懿光烈輔天承聖睿皇后合葬裕陵以大學士劉健謝遷李東陽議別祀於奉慈殿不祔廟仍稱太皇太后嘉靖十五年與紀邵二太后並移祀陵殿題主曰皇后不繫帝諡以別嫡庶其後穆宗母孝恪神宗母孝定光宗母孝靖熹宗母孝和莊烈帝母孝純咸遵用其制景帝廢后汪氏順天人正統十年冊爲郕王妃十四年冬王卽皇帝位冊爲皇后后有賢德嘗念京師諸死事及老弱遇害者暴骨原野令官校掩埋之生二女無子景泰三年妃杭氏生子見濟景帝欲立爲太子而廢憲宗后執不可以是忤帝意遂廢后立杭氏爲皇后七年杭后崩諡肅孝英宗復位卽皇后號毀所葬陵而后仍稱郕王妃景帝崩英宗以其後宮唐氏等殉議及后李賢曰妃已幽廢凡兩女幼尤可憫帝乃已憲宗復立爲太子雅知后不欲廢立事之甚恭因爲帝言遷之外王府得盡攜宮中所有而出與周太后相得其歡歲時入宮敘家人禮然性剛執一日英宗問太監劉桓曰記有玉玲瓏繫腰今何在桓言當在妃所英宗命索之后投諸井對使者曰無之已而告人曰七年天子不堪消受此數片玉耶已有言后出所攜鉅萬計英宗遣使檢取之遂立盡正德元年十二月薨議祭葬禮大學士王鏊曰葬以妃祭以后遂合葬金山明年上尊諡曰貞惠安和景皇后

憲宗廢后吳氏順天人天順八年七月立爲皇后先是憲宗居東宮萬貴妃已擅寵后旣立摘其過杖之帝怒下詔曰先帝爲朕簡求賢淑已定王氏育於別宮待期太監牛玉輒以選退吳氏於太后前復選冊立禮成之後朕見舉動輕佻禮度率略德不稱位因察其實始知非預立者用是不得已請命太后廢吳氏別宮立甫踰月耳后父俊先授都督同知至是下獄戍邊謫王孝陵種菜王從子太常少卿綸甥吏部員外郎楊琮並除名姻家懷寧侯孫鏜閒住於是南京給事中王徽王淵朱覓李翱李鈞等合疏言王罪重罰輕因並劾大學士李賢帝怒徽等皆貶邊州判官後孝宗生於西宮后保抱惟謹孝宗卽位念后恩命服膳皆如母后禮官其姪錦

衣百戶正德元年薨劉瑾欲焚之大學士王鏊持不可乃以妃禮葬

孝貞皇后王氏上元人憲宗在東宮英宗爲擇配得十二人選后及吳氏栢氏留宮中吳氏既立而廢遂冊爲皇后天順八年十月也萬貴妃寵冠後宮居處之淡如孝宗卽位尊爲皇太后武宗卽位尊爲太皇太后正德五年十二月上尊號曰慈聖康壽十三年二月崩上尊諡曰孝貞莊懿恭靖仁慈欽天輔聖純皇后合葬茂陵祔太廟

孝穆紀太后孝宗生母也賀縣人本蠻土官女成化中征蠻俘入掖庭授女史警敏通文字命守內藏時萬貴妃專寵而妬後宮有娠者皆治使墮栢賢妃生悼恭太子亦爲所害帝偶行內藏應對稱旨悅幸之遂有身萬貴妃知而恚甚令婢鈎治之婢謬報曰病瘕乃謫居安樂堂久之生孝宗使門監張敏溺焉敏驚曰上未有子奈何棄之稍哺粉餌飴蜜藏之他室貴妃日伺無所得至五六歲未敢剪胎髮時吳后廢居西內近安樂堂密知其事往來哺養帝不知也帝自悼恭太子薨後久無嗣中外皆以爲憂成化十一年帝召張敏櫛髮照鏡嘆曰老將至而無子敏伏地曰死罪萬歲已有子也帝愕然問安在對曰奴言卽死萬歲當爲皇子主於是太監懷恩頓首曰敏言是皇子潛養西內今已六歲矣匿不敢聞帝大喜卽日幸西內遣使往迎皇子使至妃抱皇子泣曰兒去吾不得生兒見黃袍有鬚者卽兒父也衣以小緋袍乘小輿擁至階下髮披地走投帝懷帝置之膝撫視久之悲喜泣下曰我子也類我使懷恩赴內閣具道其故羣臣皆大喜明日入賀頒詔天下移妃居永壽宮數召見萬貴妃日夜怨泣曰羣小給我其年六月妃暴薨或曰貴妃致之死或曰自縊也諡恭恪莊僖淑妃敏懼亦吞金死敏同安人孝宗旣立爲皇太子時孝肅皇太后居仁壽宮語帝曰以兒付我太子遂居仁壽一日貴妃召太子食孝肅謂太子曰兒去無食也太子至貴妃賜食曰已飽進羹曰疑有毒貴妃大恚曰是兒數歲卽如是他日魚肉我矣因恚而成疾孝宗卽位追諡淑妃爲孝穆慈慧恭恪莊僖崇天承聖純皇后遷葬茂陵別祀奉慈殿帝悲念太后特遣太監蔡用求太后家得紀父貴紀祖旺兄弟以聞帝大喜詔改父貴爲貴授錦衣衛指揮同知祖旺爲旺授錦衣衛指揮僉事賜子第宅金帛莊田奴婢不可勝計追贈太后父爲中軍

都督府左都督母爲夫人其曾祖祖父亦如之遺修太后先塋之在賀者置守墳戶復其家先是太后在宮中嘗自言家賀縣姓紀幼不能知親族也太監郭鏞聞而識之太監陸愷者亦廣西人故姓李蠻中紀李同音因妄稱太后是令人訪其族人詣京師愷女兄夫韋父成者出冒之有司待以戚畹名所居里曰迎恩里貴旺曰韋猶冒李兄我實李氏因詐爲宗系上有司有司莫辨也二人既驟貴父成亦詣闕爭辨帝命郭鏞按之鏞逐父成猶令馳驛歸及帝使治后先塋蠻中李姓者數輩皆稱太后家自言於使者使者還奏貴旺不實復遣給事中孫珪御史滕祐間行連賀間微服入獠獠中訪之盡得其狀歸奏帝謫罰鏞等有差戾貴旺邊海自此帝數求太后家竟不得弘治三年禮部尚書耿裕奏曰粵西當大征之後兵燹饑荒人民奔竄歲月悠遠踪跡難明昔孝慈高皇后與高皇帝同起艱難化家爲國徐王親高皇后父當后之身尋求家族尚不克獲然後立廟宿州春秋祭祀今紀太后幼離西粵人侍先帝連賀非徐宿中原之地竊宮無母后正位之年陛下訪尋雖切安從得其實哉臣愚謂可做徐王故事定擬太后父母封號立祠桂林致祭帝曰孝穆皇太后早棄朕躬每意思念怒焉如割初謂宗親尚可旁求寧受百欺冀獲一是卿等謂歲久無從物色請加封立廟以慰聖母之靈皇祖既有故事朕心雖不忍又奚敢違於是封后父推誠宣力武臣特進光祿大夫柱國慶元伯諡端僖后母伯夫人立廟桂林府有司歲時祀大學士尹直撰哀冊有云親漢家堯母之門增宋室仁宗之慟帝燕閒念誦輒歎歔流涕也

孝惠邵太后憲宗妃興獻帝母也父林昌化人貧甚鬻女於杭州鎮守太監妃由此入宮知書有容色成化十二年封宸妃尋進封貴妃興王之藩妃不得從世宗入繼大統妃已老目眊矣喜孫爲皇帝摸世宗身自頂至踵已尊爲皇太后嘉靖元年上尊號曰壽安十一月崩帝欲明年二月遷葬茂陵大學士楊廷和等言祖陵不當數興工作驚動神靈不從諡曰孝惠康肅溫仁懿順協天祐聖皇太后別祀奉慈殿七年七月改稱太皇太后十五年遷主陵殿稱皇后與孝肅孝穆等

恭肅貴妃萬氏諸城人四歲選入掖廷爲孫太后宮女及長侍憲宗於東宮憲宗年十六卽位妃已三十有五

機警善迎帝意遂譏廢皇后吳氏六宮希得進御帝每遊幸妃戎服前驅成化二年正月生皇第一子帝大喜遣中使祀諸山川遂封貴妃皇子未期薨妃亦自是不復娠矣當是時帝未有子中外以爲憂言者每請溥恩澤以廣繼嗣給事中李森魏元御史康永韶等先後言尤切四年秋彗星屢見大學士彭時尚書姚夔亦以爲言帝曰內事也朕自主之然不能用妃益驕中官用事者一忤意立見斥逐掖廷御幸有身飲藥傷墜者無數孝宗之生頂寸許無髮或曰藥所中也紀淑妃之死實妃爲之佞倖錢能覃勤汪直梁芳韋興輩皆假貢獻苛歛民財傾竭府庫以結貴妃歡奇技淫巧禱祠宮觀糜費無算久之帝後宮生子漸多芳等懼太子年長他日立將治己罪同導妃勸帝易儲會泰山震占者謂應在東宮帝心懼事乃寢二十三年春暴疾薨帝輟朝七日諡曰恭肅端慎榮靖皇貴妃葬天壽山弘治初御史曹璘請削妃諡號魚臺縣丞徐瑱請逮治診視紀太后諸醫捕萬氏家屬究問當時薨狀孝宗以重違先帝意已之

學叔官總理事務經編議官少保兼太子太傅陳和樞大學士兼管吏部戶部尚書事加六級張建嘉慶

敕修

后妃二

孝宗孝康張皇后

武宗孝靜夏皇后

世宗孝潔陳皇后

張廢后

孝烈方皇后

孝恪杜太后

穆宗孝懿李皇后

孝安陳皇后

孝定李太后

神宗孝端王皇后

劉昭妃

孝靖王太后

鄭貴妃。

光宗孝元郭皇后

孝和王太后

李純劉太后

李康妃

李莊妃

趙選侍

熹宗懿安張皇后

張裕妃

莊烈帝愍周皇后

田貴妃

孝宗孝康皇后張氏興濟人父鬱以鄉貢入太學母金氏夢月入懷而生后成化二十三年選為太子妃是年
孝宗即位冊立為皇后帝頗優禮外家追封魯昌國公封后弟鶴齡壽寧侯延齡建昌伯為后立家廟於興濟
工作壯麗數年始畢鶴齡延齡並注籍宮禁殺家人為奸利中外諸臣多以為言帝以后故不問武宗即位尊
為皇太后五年十二月以賓鐺平上尊號曰慈壽皇太后世宗入繼稱聖母加上尊號曰昭聖慈壽恭靖三年
加上昭聖康惠慈壽已改稱伯母十五年復加上昭聖恭安康惠慈壽二十年八月崩謚曰孝康靖肅莊慈哲
懿謝天贊聖敬皇后合葬泰陵祔廟武宗之崩也江彬等懷不軌賴后與大學士楊廷和定策禁中迎立世宗
而世宗事后顧日益薄元年大婚初傳昭聖懿旨既復改壽安太后壽安者憲宗妃興獻帝生母也廷和爭之
乾隆四年校刊

乃止三年與國太后誕節敕命婦朝賀燕饗倍常及后誕日敕免賀修撰舒芬疏諫奪俸御史朱淵馬明衡陳
逅季本員外郎林惟聰等先後言皆得罪竟罷朝賀初興國太后以藩妃入太后猶以故事遇之帝頗不悅及
帝朝太后待之又倨會太后弟延齡爲人所告帝坐延齡謀逆論死太后寤迫無所出哀冲太子生請入賀帝
謝不見使人請不許大學士張孚敬亦爲延齡請帝手敕曰天下者高皇帝之天下孝宗皇帝守高皇帝法卿
應傷伯母心豈不應傷高孝二廟心耶孚敬復奏曰陛下嗣位時用臣言稱伯母皇太后朝臣歸過陛下至今
未已茲者大小臣工默無一言誠幸太后不得令終以重陛下過耳夫謀逆之罪獄成當坐族誅昭聖獨非張
氏乎陛下何以處此冬月慮因帝又欲殺延齡復以孚敬言而止亡何奸人劉東山者告變并逮鶴齡下詔獄
太后至衣敝襦席藁爲請亦不聽久之鶴齡瘐死及太后崩帝竟殺延齡事詳外戚傳

武宗孝靜皇后夏氏上元人正德元年冊立爲皇后嘉靖元年前上尊稱曰莊肅皇后十四年正月崩合葬康陵
祔廟初禮臣上喪儀帝曰嫂叔無服且兩宮在上朕服青臣民如母后服禮部尚書夏言曰皇上以嫂叔絕服
則羣臣不敢素服見皇上請暫罷朝參許之已而議諡大學士張孚敬曰大行皇后上嫂也與累朝元后異宜
用二字或四字李時曰宜用八左都御史王廷相吏部侍郎霍韜等曰均帝后也何殊言集衆議因奏曰古人
尚質諡法簡稱其行後人增加臣子情也生今世宜行今制大行皇后宜如列聖元后諡二四及八於禮無據
帝不從命再議羣臣請如孚敬言帝曰用六合陰數焉於是上諡孝靜莊惠安肅毅皇后十五年帝覺孚敬言
非是敕曰孝靜皇后諡不備不稱配武宗乃改諡孝靜莊惠安肅溫誠順天僭聖毅皇后

世宗孝潔皇后陳氏元城人嘉靖元年冊立爲皇后帝性嚴厲一日與后同坐張方二妃進茗帝循視其手后
恚投杯起帝大怒后驚悸墮娠崩七年十月也喪禮從殺帝素服御西角門十日卽元冠元裳御奉天門諡曰
悼靈葬襖兒峪葬之日梓宮出王門百官一日臨給事中王汝梅諫不聽十五年禮部尚書夏言議請改諡時
帝意久釋矣乃改諡曰孝潔穆宗卽位禮臣議孝潔皇后大行皇帝元配宜合葬祔廟若遵遺制祔孝烈則舍
元配也若同祔則二后也大行皇帝升祔時宜奉孝潔配遷葬永陵孝烈主宜別祀報可隆慶元年二月上尊

諡曰孝潔恭懿慈睿安莊相天翊聖肅皇后

廢后張氏世宗第二后也初封順妃七年陳皇后崩遂立爲后是時帝方追古禮令后率嬪御親蠶北郊又日率六宮聽講章聖女訓於宮中十三年正月廢居別宮十五年薨喪葬儀視宣宗胡廢后

孝烈皇后方氏世宗第三后也江寧人帝卽位且十年未有子大學士張孚敬言古者天子立后竝建六宮三夫人九嬪二十七世婦八十一御妻所以廣嗣也陛下春秋鼎盛宜博求淑女爲子嗣計從之十年三月后與鄭氏王氏閻氏韋氏沈氏盧氏沈氏杜氏同冊爲九嬪冠九翟冠大采鞠衣圭用次玉黻文冊黃金塗視皇后殺五分之一至期帝袞冕告太廟還服皮弁御華蓋殿傳制遣大臣行冊禮既冊從皇后朝奉先殿禮成帝服皮弁受百官賀蓋創禮也張后廢遂立爲后而封沈氏爲宸妃閻氏爲麗妃舊制立后謁內廟而已至是下禮臣議廟見禮於是羣臣以天子立三宮以承宗廟禮經有廟見之文乃考據禮經參稽大明集禮擬儀注以上至期帝率后謁太廟及世廟越三日頒詔天下明日受命婦朝二十一年宮婢楊金英等謀弒逆帝賴后救得免乃進后父泰和伯銳爵爲侯初曹妃有色帝愛之冊爲端妃是夕帝宿端妃宮金英等伺帝熟寢以組縊帝項誤爲死結得不絕同事張金蓮知事不就走告后后馳至解組帝蘇后命內監張佐等捕宮人雜治言金英等弒逆王寧嬪首謀又曰曹端妃雖不與亦知謀時帝病憊不能言后傳帝命收端妃寧嬪及金英等悉磔於市并誅其族屬十餘人然妃實不知也久之帝始知其冤二十六年十一月乙未后崩詔曰皇后比救朕危奉天濟難其以元后禮葬預名葬地曰永陵諡孝烈親定諡禮視昔加隆焉禮成頒詔天下及大祥禮臣請安主奉先殿東夾室帝曰奉先殿夾室非正也可卽耐太廟於是大學士嚴嵩等請設位於太廟東皇妣唐皇后之次後寢藏主則設幄於憲廟皇祖妣之右以從耐於祖姑之義帝曰耐禮至重豈可權就后非帝乃配帝者自有一定之序安有享從此而主藏彼之禮其祀仁宗耐以新序卽朕位次勿得亂禮嵩曰耐新序非臣下所敢言且陰不可當陽位乃命姑藏主唐皇后側二十九年十月帝終欲耐后太廟命再議尚書徐階言不可給事中楊思忠是階議餘無言者帝覘知狀及議疏入謂后正位中宮禮宜耐享但遽及廟次則臣子之情不唯不

敢實不忍也宜設位奉先殿帝震怒階思忠惶恐言周建九廟三昭三穆國朝廟制同堂異室與周禮不同今太廟九室皆滿若以聖躬論仁宗當祧固不待言但此乃異日聖子神孫之事臣聞夏人之廟五商以七周以九禮由義起五可七可九九之外亦可加也請於太廟及奉先殿各增二室以祔孝烈則仁宗可不必祧孝烈皇后可速正南面之位陛下亦無預祧以俟之嫌帝曰臣子之誼當祧當耐力請可也苟禮得其正何猶豫爲於是階等復會廷臣上言唐虞夏五廟其祀皆止四世周九廟三昭三穆然而兄弟相及亦不能盡足六世今仁宗爲皇上五世祖以聖躬論仁宗於禮當祧孝烈皇后於禮當耐請祧仁宗耐孝烈皇后於太廟第九室因上祧耐儀注已而請忌日祭帝猶銜前議報曰孝烈繼后所奉者又入繼之君忌不祭亦可階等請益力帝曰非天子不議禮后當耐廟居朕室次禮官顧謂今日未宜徒飾說以惑衆聽因諭嚴嵩等曰禮官從朕言勉強耳卽不忍祧仁宗且置后主別廟將來由臣下議處忌日令奠一卮酒不至傷情於是禮臣不敢復言第請如敕行乃許之後二年楊思忠爲賀表觸忌子杖削籍隆慶初與孝潔皇后同日上尊諡曰孝烈端順敏惠恭誠祇天衛聖皇后移主弘孝殿

孝恪杜太后穆宗生母也大興人嘉靖十年封康嬪十五年進封妃三十三年正月薨是時穆宗以裕王居邸禮部尚書歐陽德奏喪儀請輟朝五日裕王主喪事遵高皇帝孝慈錄斬衰三年帝謂當避君父之尊大學士嚴嵩言高帝命周王橚爲孫貴妃服慈母服斬衰三年是年孝慈錄成遂爲定制自後久無是事及茲當作則垂訓於後帝命比賢妃鄭氏故事輟朝二日賜諡榮淑葬金山穆宗立上諡曰孝恪淵純慈懿恭順贊天開聖皇太后遷葬永陵祀主神霄殿追封后父林爲慶都伯命其子繼宗嗣

穆宗孝懿皇后李氏昌平人穆宗爲裕王選爲妃生憲懷太子嘉靖三十七年四月薨帝以部疏稱薨非制命改稱故葬金山穆宗卽位諡曰孝懿皇后封后父銘德平伯神宗卽位上尊諡曰孝懿貞惠順哲恭仁儷天襄聖莊皇后合葬昭陵耐太廟

孝安皇后陳氏通州人嘉靖三十七年九月選爲裕王繼妃隆慶元年冊爲皇后后無子多病居別宮神宗卽